



Arkivnr: 2014/10030-14

Saksbehandlar: Odd Bjarne Berdal

## Saksframlegg

### Saksgang

Utval	Saknr.	Møtedato
Opplærings- og helseutvalet		16.09.2014

### Oppfølging av skulebruksplanen

Skulebruksplanen (SBP) for perioden 2012-2025 vart handsama i fylkestinget i desember 2012 og mars 2013. Gjennomføringa av vedtaka i skulebruksplanen vert følgd opp gjennom prosjektet «Varige og gode verknader av skulebruksplanen». Prosjektet skal bidra til at HFK følgjer opp og koordinerer dei ulike tiltaka i skulebruksplanen fram mot 2025. Gjennomføring av tiltaka vil skje i linja.

#### Rapportering til politisk utval

Prosjektet søkjer å gi ein omfattande statusrapport på gjennomføring av tiltaka i juni kvart år. Når det gjeld konsekvensar for tilbudsstrukturen som følgje av gjennomføring av tiltaka i skulebruksplanen, vert dette gjort greie for i klassesaka kvar haust.

Denne løypemeldinga tar føre seg status knytt til alle skulane i Hordaland og er i så måte ei meir omfattande løypemelding enn den som vart lagt fram for OPHE 11.02 i år. Dette inneber vidare at det i denne saka og vert gjort framlegg om vedtak der fylkesrådmannen foreslår ei endring i forhold til eksisterande vedtak, eller der fylkesrådmannen freistar å sette i gong aktivitet eller utgreiingar som kan innebere nye framlegg om endring av vedtak.

#### Samandrag

Dei to viktigaste områda som vert omhandla i denne løypemeldinga, er overkapasitet på Studiespesialiserande utdanningsprogram (ST) i Bergen og planlegginga av Nye Åsane vgs.

I Stor-Bergen er det trong for ein heilskapleg gjennomgang av tilbudsstrukturen på ST. Særleg kritisk er overkapasiteten i Bergen Vest, men ei sentral brikke i så måte er lagnaden til Fana gymnas, då denne skulen vil ha dimensjonerande konsekvensar i eigen bydel, men og i dei omkringliggjande bydelane.

For Nye Åsane vgs vert det lagt til grunn at Bygg- og anleggsteknikk (BA) vert ein del av tilbodet til den nye skulen. Vidare ønskjer ein å vurdere nye måtar å drive yrkesopplæring på i den nye skulen mellom anna med ei meir aktiv tilknytning til lærebedriftene og opplæringskontora for yrkesfag. Ein viktig referanse i så måte er Kuben Yrkesarena i Oslo. I denne samanheng vil det også vere naudsynt å sjå på tilbudsstrukturen innan yrkesfaga samla sett i Stor-Bergen.

Åsane vgs har ansvar for Opplæring i Kriminalomsorga (Fengselsundervisninga), mellom anna avdeling Fossane, som har tilbod til dei som er ferdige med soning eller har tryggingssavtale. Det er naturleg å vurdere fysisk integrering av avdelinga på Fossane med den nye vidaregåande skulen. Dette er eit synspunkt som mellom anna har kome fram på bakgrunn av erfaringar som er gjort med slik integrering ved Steinkjer vgs. Både for den nye skulen i Åsane og for Tertnes vgs er det knytt utfordringar til å sikre

tilstrekkeleg kapasitet på idrettshall. Det må også skje ei avklaring overfor Bergen kommune knytt til kapasitet på idrettsanlegg som skulane kan nytte. Dette kan òg få konsekvensar for fagtilbodet på dei to skulane. Ovannemnde forhold bør avklarast før vidare programmeringsarbeid for Nye Åsane vgs kan halde fram.

### Forslag til vedtak

<p><b>Region Sør og ST Stor-Bergen</b></p> <p>a) Avgjerda om framtida til Fana gymnas vert framskunda med eitt år, og forslag til framtidig struktur på studiespesialiserande utdanningsprogram i Stor-Bergen vert lagt fram som politisk sak våren 2015. Fysisk samanslåing av Arna vgs og Garnes vgs må vurderast i denne samanheng.</p>
<p><b>Bergen Vest</b></p> <p>a) Strukturelle endringar i tilbodsstrukturen i Bergen Vest heng saman med tilbodsstrukturen på ST i Stor-Bergen. Våren 2015 skal det takast ei avgjerd om tilbodet i Bergen Vest. Dette vil innebere at eventuelle strukturelle endringar vil bli sett i verk frå skuleåret 2016/2017.</p>
<p><b>Region Nord</b></p> <p>a) Hausten 2014 starter ein opp arbeidet med ei administrativ samanslåing av Arna vgs og Garnes vgs</p> <p>b) I programmeringsarbeidet for Nye Åsane vgs vert det lagt til grunn at Bygg- og anleggsgag skal vere ein del av tilbodet ved skulen</p> <p>c) Programmeringsarbeidet ved Nye Åsane vgs vert midlertidig stoppa til ei nærmare avklaring rundt følgjande forhold ligg føre:</p> <ol style="list-style-type: none"> <li>i. Mogleg integrering av avd. Fossane ved Nye Åsane vgs</li> <li>ii. Organisering av yrkesopplæringa ved Nye Åsane vgs. I den samanheng bør det òg gjerast ei samla vurdering av strukturen på yrkesfagtilbodet i Stor Bergen</li> <li>iii. Fordeling av fagtilbod på Tertens vgs og Åsane vgs samt vurdering av trongen for klasserom knytt til dette.</li> <li>iv. Kapasitet på idrettshall ved Tertnes vgs og Åsane vgs og vurdering av kor det eventuelt er mest tenleg å bygge idrettshall i fylkeskommunal regi.</li> </ol> <p>Vurderingane vedkomande Nye Åsane vgs vert lagt fram som ei eiga sak for politisk utval tentativt i desember 2014.</p>
<p><b>Fagskulen</b></p> <p>a) Det skal gjennomførast ei utgreiing av alternativ lokalisering for ein samla fagskule.</p>

Rune Haugsdal  
fylkesrådmann

Svein Heggheim  
fylkesdirektør opplæring

*Saksframlegget er godkjent elektronisk og har derfor inga underskrift.*

## Fylkesrådmannen, 01.09.2014

### Overkapasitet på (studiespesialiserande) ST i Bergen

I Bergen er det no ein relativt stor overkapasitet på elevplassar på ST. Elevsøkinga viser at elevane søker mot skulane i sentrum. Dei fleste privatskulane er store på studiespesialiserande, og desse er i all hovudsak lokaliserte i sentrum. Hordaland fylkeskommune satsar på eit omfattande tilbod i sentrum og møter konkurransen frå privatskulane gjennom Amalie Skram vgs og utviding av tilbodet på studiespesialiserande på Bergen Katedralskole. Samtidig er det overkapasitet i bydelane. Slik situasjonen er i Bergen med omsyn til søkjemønster og kvar elevane bur i forhold til kvar dei går på skule, kan ein ikkje sjå på tilbodet i bydelane isolert sett. Det er naudsynt å vurdere kapasiteten på ST i Bergen samla.

### Tilråding

Fylkesrådmannen tilrår difor at det våren 2015 vert lagt fram ei politisk sak som vurderer tilbodet av ST i Stor-Bergen samla.

### Region Nord

#### Arna vgs og Garnes vgs

Begge skulane har lite elevgrunnlag og slit med å fylle opp fleire av fagtilboda dei tilbyr. Tilboda i Arna har konkurrerende tilbod både i sentrum, i Åsane og på Osterøy. Garnes vgs hadde sist år elevtal til å opprette 1 klasse på ST Vg1. Søkjertala inneverande år syner at det framleis er grunnlag for 1 klasse på Vg1 ST, jf. sak om prognoseinntaket i mai.

Det er gjort sonderingar mot Bergen kommune for å avgjere grunnlaget for vidare utgreiing av ein «8-13-skule» på Seimsmyrane. Vurderinga så langt er at 8-13-skule ikkje er aktuelt på kort sikt, men dette vil vere naturleg å vurdere noko lenger fram i tid. Bergen kommune er i gong med planlegging av ny skule på Seimsmyrane i Arna. I denne fasen er det viktig at Hordaland fylkeskommune tek stilling til om reguleringsplanen skal ta høgde for at det på eit seinare tidspunkt kan gjerast utviding til ein 8-13-skule på tomta. Det er starta opp ei arbeidsgruppe med Bergen kommune som etter planen skal leggje fram sitt arbeid i desember 2014.

Vedtaket i Skulebruksplanen (SBP) tilseier at ST ved Garnes vgs skal vidareførast, og at skulane skal slåast saman i lokala til Arna vgs. Ettersom denne skulen ikkje er planlagt for ST vil ei samanslåing medføre trong for ombygging eller tilbygg. Fylkesrådmannen vurderer det difor som lite tenleg med ei fysisk samanslåing av skulane i lokala til Arna vgs før det er gjort ein gjennomgang på tilbodsstrukturen innan ST i Stor-Bergen. Sett i lys av at det på sikt kan vere aktuelt med ein 8-13 skule på Seimsmyrane er det heller ikkje tenleg med større investeringar i lokala til Arna vgs før denne saka er nærmare avklara.

### Tilråding

På bakgrunn av vedtaket om samanslåing av skulane i Arna tilrår fylkesrådmannen at ein i løpet av hausten 2014 startar opp arbeidet med gjennomføring av ei administrativ samanslåing av Garnes vgs og Arna vgs. Dei to skulane i Arna ligg ikkje langt frå kvarandre, og ei administrativ samanslåing er ikkje direkte avhengig av fysisk samlokalisering. Elevgrunnlag, skulestorleik, økonomiske rammer og endring av utdanningsprogrammet Media og kommunikasjon (MK) inneber uvisse for personale og elevar, og det er viktig med avklaringar så snart som råd. Ei administrativ samanslåing vil representere eit viktig steg mot 1 skule i Arna.

#### Osterøy vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

#### Austrheim vgs

Arbeid med 8-13-samarbeid med Austrheim kommune er starta opp. Avtale om sal av elevplassar til elevar frå Sogn og Fjordane er prisjustert og vidareført i 3 år fram til og med skuleåret 2016/2017.

Knarvik vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

Tertnes vgs

Toppidrettstilbodet på symjing vert flytta til Amalie Skram vgs frå hausten 2014. Planlegginga av flytting av Service og samferdsle (SS) og tilbodet innan Tilrettelagt opplæring (TO) til Nye Åsane vgs ligg inne i programmeringsarbeidet for den nye skulen. I SBP er det lagt til grunn flytting av ST frå Åsane vgs til Tertnes. Auken i elevtal saman med tilbod om toppidrett vil gi utfordringar med tanke på tilstrekkeleg kapasitet på klasserom og idrettsanlegg. Det vil difor vere naudsynt å avklare med Bergen kommune kor mykje tid skulen kan disponere i Åstveithallen framover. Vidare må ein sjå kva andre hallressursar som er tilgjengelege i nærleiken. Alternativt kan ein vurdere å byggje ny idrettshall ved skulen.

**Tilråding**

Fylkesrådmannen tilrår at det vert gjort ei ny vurdering når det gjeld fordeling av utdanningsprogramma mellom dei to skulane i Åsane. Vidare må det vurderast om det skal byggast idrettshall i fylkeskommunal regi enten ved Tertnes vgs eller ved Nye Åsane vgs.

Nye Åsane vgs

Medio februar 2014 starta programmering av ny skule i Åsane der delar av tilbodet ved U. Pihl vgs, Lønborg vgs og Åsane vgs skal bli samlokalisert ved dei noverande lokala til U. Pihl vgs.

Reguleringsplanen for Åsane senterområde, som skuletomta er del av, er vedteken, og det er inngått ein avtale om rekkefølgekrava knytt til reguleringsplanen. Detaljregulering av skuletomta kan først starte når pris- og designkonkurransen er gjennomført.

Planlagt start på byggearbeidet er tidlegast primo 2016 med ei foreløpig stipulert byggjetid på 2 år. Det må takast atterhald om framdrifta på grunn av stopp i programmeringsarbeidet og hindringar som kan oppstå i samband med detaljregulering av skuletomta. Det er også uklart kva idrettshallkapasitet som vil vere mogleg å leige av Bergen kommune for den nye skulen. HFK sin bruk av Åsanehallen er regulert i avtale som sikrar tilgang fram til eit nytt alternativ er klart, men dette vil ikkje vere tilstrekkeleg for skulen sitt fagtilbod. Bergen kommune har planar om å bygge ein ny arena for topphandball og andre hallidrettar i Myrdalsområdet som grensar opp mot skuletomta. Ein ny hall vil ha større kapasitet enn dagens Åsanehall og vil kunne tilfredsstille behovet til ei ny skule. Kommunen sine planar er derimot lite konkrete og vil kunna liggje langt fram i tid. Alternativt kan ein vurdere å byggje idrettshall integrert i den nye skulen. Eigedomsseksjonen arbeider mellom anna mot Bergen kommune for å avklare dette nærare.

I Fylkestinget sitt vedtak frå 12.03.13, sak 1/13 for Nye Åsane vgs, er ikkje bygg- og anleggsgag (BA) tatt med som eit framtidig tilbod ved skulen, men det er heller ikkje nemnt i vedtaket at tilbodet skal flyttast eller leggjast ned. Fylkesrådmannen legg til grunn at BA har blitt utelate i vedtaket ved ein feil. I det vidare programmeringsarbeidet er difor BA ein del av tilbodet som vert gitt ved skulen.

Det er ønskeleg med ei ny vurdering av integrering av fengselsundervisninga, innsusingsavdelinga Fossane. Ei lokalisering i tilknytning til hovudskulen gir ein sterkare integrasjon med hovudskulen. Føremonene med det er auka fleksibilitet. Ein vil ha eit stort personale å spele på lag med. Ein får ein felles identitet med hovudskulen, og faren for utvikling av "subkultur" blir mindre. Ein vil i større grad vere forankra i eit fagleg miljø, og "normalitetstankegangen" blir tydelegare. Det er svært viktig at føremonene med ei slik integrering vert vurdert opp mot tryggleiksaspektet og andre potensielt negative konsekvensar ei slik integrering kan medføre. Eit viktig argument for å vurdere dette på nytt er erfaringar som er gjort ved Steinkjer vgs. Sidan hausten 2012 har denne skulen hatt innsusingsavdelinga integrert som ein del av skulen. Tidlegare har ein i liten grad hatt relevante døme av dette slaget å samanlikne med som grunnlag for å kunne ta ei avgjerd. Parallelt med programmeringsarbeidet vil ein utgreie ei eventuell integrering av Fossane i den nye skulen. I dette arbeidet er det og lagt inn ein studietur til Steinkjer vgs.

Med tanke på at ein byggjer ein ny skule med yrkesretta fagtilbod, ser fylkesrådmannen det som viktig at det vert tenkt nytt og framtidretta i planlegginga av skulen. Åsane ligg ikkje så langt unna verken Knarvik

eller Arna, og det må vere eit poeng å sjå tilbod og arealutforming ved dei tre skulane i samanheng, særleg når det gjeld BA og Teknologi og industriell produksjon (TIP). Dette gir rom for nytenking rundt organiseringa av yrkesfaga på den nye skulen. Dette er særleg viktig i forhold til lærlingar og samarbeid med næringslivet og opplæringskontora for yrkesfag. Ein viktig referanse i så måte er Kuben Yrkesarena i Oslo som blei opna hausten 2013. Der er det oppretta eit læringscenter for byggfag som opplæringskontora samarbeider om. Dette er noko Hordaland ønskjer å hente inspirasjon frå. Det er nedsett ei eiga arbeidsgruppe med representantar frå Opplæringsavdelinga og opplæringskontora i Hordaland. Opplæringskontora har meldt at dei stiller seg positive til eit slikt initiativ. Grappa vil mellom anna foreta ein studietur til Kuben Yrkesarena. Programmeringsarbeidet for skulen vert midlertidig stoppa til dei nye innspela knytt til Fossane og organisering av yrkesfaga er avklara.

Tannhelsetenesta planlegg i sin klinikkstrukturplan ny klinikk på Nye Åsane vgs til erstatning for Rolland tannklinikk og U. Pihl tannklinikk. Ved å etablere ny tannklinikk i Nye Åsane vgs vert det lagt til rette for eit fruktbart samarbeid mellom tannhelsetenesta og skulen sitt utdanningstilbod for tannhelsesekretærar. Planlegginga av ny tannklinikk ved skulen vert difor tatt med i det vidare programmeringsarbeidet.

Nye Åsane vgs vil tidlegast stå ferdig skuleåret 2018/2019. Etter kriteria nedfelt i SBP skal ein tidlegast mogleg slå saman administrativt dei skulane som er vedtatt samlokaliserte. Det vil difor vere naturleg at ein vurderer tidspunktet for arbeidet med administrativ samanslåing av skulane.

### **Tilråding**

Fylkesrådmannen tilrår at programmeringsarbeidet ved Nye Åsane vgs vert midlertidig stoppa til ei nærmare avklaring rundt følgjande forhold ligg føre:

- Integrering av avd. Fossane ved Nye Åsane vgs
- Organisering av yrkesopplæringa ved Nye Åsane vgs. I den samanhenga må ein òg gjere ei samla vurdering av strukturen på yrkesfagtilbodet i Stor-Bergen
- Fordeling av fagtilbod på Tertnes vgs og Nye Åsane vgs samt vurdering av trongen til klasserom knytt til dette.
- Vurdering av trongen for idrettshall og fysisk plassering ved Tertnes vgs eller Åsane vgs

Ovannemnde avklaringar er planlagt lagt fram for politisk handsaming i desember 2014

## **Region Sentrum**

### Tilrettelagt tilbod (TO) i Bergen

Som det vart orientert om i løypemeldinga i februar er det gjort endringar for TO-tilbodet i Margaretastredet. Dette er frå hausten 2014 lagt under Årstad vgs i staden for Amalie Skram vgs. Tilbodet vil fysisk flytte til Årstad vgs når ombyggingsarbeidet der er ferdig. Stend vgs har utvida sitt tilbod i samsvar med vedtak i SBP. I Bergen Vest og Askøy er det trong for fleire elevplassar i grupper med redusert elevtal. Dette må ein arbeide vidare med framover.

### Bergen Maritime vgs

For å løyse skulen sitt arealbehov mellom anna med tanke på auka tilbod på Elektrofag (EL) og TIP har eigedomsavdelinga innleia forhandlingar om leigeareal i tilstøytande bygg. Dette vil innebere ein arealauke på om lag 800 kvm. Det er førebels ikkje avklart kor stor del av aktiviteten til fagskulen som kan lokaliserast i Haugevegen. Uansett vil denne utvidinga av lokala utgjere den arealmessige ramma for skulen framover. Dersom det er trong for ytterlegare auke i tilbodet på TIP og EL, vil Årstad vgs kunne ha kapasitet til noko utviding innanfor eksisterande areal når byggarbeidet der er ferdig.

### Årstad vgs

Skulen vil frå hausten 2014 overta tilbodet i Helse og oppvekst (HO) frå Bjørgvin vgs. Tilbodet vil i 2 skuleår framover bli gitt i lokala til Bjørgvin vgs fram til byggarbeidet på Årstad er ferdig. I 2014 vert det investert for om lag 7 mill. kr i nytt undervisningsutstyr til dei nye verkstadane på TIP. Dette vil vonleg gi eit stort kvalitetsløft til undervisninga på dette programområdet. Når det gjeld Design og handverk (DH), er det

inngått ny leigekontrakt på mellombels lokale i Solheimsgaten. Avtalen skal gjelde medan byggearbeidet held fram.

#### Bergen Katedralskule (BKS) – Vaksenopplæring (VO) – BHG-bygget - Kyrre skole

Programmeringsarbeidet for utviding av tilbodet på BKS er inne i ein avsluttande fase. SBP la til grunn ei utviding med tre parallellar utan større nybygg, ingen større investeringar og fjerning av eksisterande undervisningsbrakker. Programmeringsarbeidet har synt at det vil vere krevjande med ei utviding av slik storleik ved skulen på dei premissane. Utgreiingsarbeidet har enno ikkje konkludert med kor stor utviding som er realistisk å få til. Dette gjer at det er naudsynt med ei vurdering av kva elevgrupper som skal prioriterast med tanke på tilbodet ved skulen. I det vidare arbeidet legg ein til grunn ei prioritering av ordinært studiespesialisierende tilbod, IB og minoritetsspråklege. Dette vil kunne innebere at tilbodet for innføringsklassane vert foreslått flytta. Fylkesrådmannen vil kome attende til denne saka når kapasiteten i skulebygget er avklart.

Planlegging av ombygging av BHG til Vaksenopplæring er òg i gang. Primært er det undervisningstilbodet knytt til BKS som skal inn i BHG-bygget. Det vil kome ei eiga sak om organisering av vaksenopplæringa.

I perioden medan BHG vert UU-tilpassa (universelt utforma) og renoverert (skuleåret 2014/2015), vil vaksenopplæringa ha sin aktivitet i lokala til tidlegare Tanks vgs. Desse lokala er selde, og det vil bli gjort avgrensa og midlertidige tilpassingar for det skuleåret undervisninga er lagt hit. Dette inneber mellom anna at 1. etg i bygget blir UU-tilpassa.

Kyrre skole rettar sitt tilbod til ungdomar med psykiske vanskar og med behov for tilrettelegging i form av eit mindre skulemiljø, mindre undervisningsgrupper og færre timar i veka. Mange har oppfølging gjennom OT/PPT. Skulen gir i dag undervisning til om lag 110 elevar. Det er ikkje kapasitet til å auke dette tilbodet i noverande lokale. Det bør vurderast å auke tilbodet til denne gruppa elevar, men denne type undervisningstilbod bør bli gitt i mindre einingar, og ein auke er truleg mest tenleg å gjere ved å opprette ei ny eining. Tilbodet på Kyrre er frå hausten 2014 administrativt lagt under BKS. Kyrre er i eit gammalt bygg med trong for utbetring og som er mindre eigna som skule. Inntil vidare vil Kyrre oppretthalde aktiviteten i noverande lokale. Arbeidet med å finne betre eigna lokale for denne målgruppa held fram.

#### Amalie Skram vgs

Skulen har hatt oppstart som planlagt hausten 2014. TO-tilbodet er flytta til Årstad vgs.

Utover det som vert dekt av utstyr i byggeprosjektet, vil det vere ein relativt stor trong for investeringar i utstyr for å få skulen fullt operativ frå skulestart. Skulen har som ambisjon å vere på eit svært høgt nivå når det gjeld pedagogisk bruk av IKT i undervisninga. Den budsjettmesige planlegginga av AV-utstyr då skulen vart planlagt har ikkje vore i samsvar med den teknologiske utviklinga og ambisjonsnivået til skulen. Den teknologien ein no vil bruke i idrettshall og klasserom, var heller ikkje tilgjengeleg då skulen vart planlagt. Økonomisk er det krevjande å få dette på plass, og det kan vere trong for å sette av midlar til ytterlegare investeringar ved Amalie Skram vgs.

Proessen knytt til oppretting av Amalie Skram vart evaluert saman med tillitsvalde i juni i år.

#### Status ledige bygg, Tanks – Bjørgvin

Tank vgs er seld og leigd tilbake i inntil 4 år. Medan ein driv ombyggingsarbeid på BKS og BHG, vil Tanks vere disponibel både for det ordinære undervisningstilbodet ved BKS og Vaksenopplæringa. Det vil truleg vere noko ledig kapasitet i Tanks-bygget i denne perioden, men dette vil kunne variere og er for tidleg å seie noko presist om no. BKS vil administrere bygget i leigeperioden.

Bjørgvin-bygget vil fram til byggjeprojektet på Årstad vgs er ferdig, framleis ha undervisning av HO-tilbodet som låg til Bjørgvin vgs. Dette dreiar seg om ca. 100 elevar og 15 tilsette. Det vil vere relativt mykje ledig kapasitet i bygget som inntil vidare er planlagt disponibelt for mellombelse løysingar som følgje av gjennomføring av tiltak i SBP framover. Med tanke på inventar, utstyr og IT-infrastruktur er bygget 100 %

operativt som undervisningsbygg. Heiltidsundervisning på opp til 300 elevar kan på kort tid leggjast til Bjørgvin-bygget.

#### Samanslåing Bergen Tekniske Fagskule (BTF) og Bergen maritime Fagskule (BMF)

Programmeringsarbeidet for fagskulen (BMF+BTF) i nye lokale i Haugeveien har starta opp. Fylkesrådmannen legg til grunn at det ikkje vert nybygg knytt til lokala i Haugeveien. Det er førebels ikkje avklart kor stor del av det maritime fagskuletilbodet det er rom for å samlokalisere i Haugeveien. Haugeveien er eit krevjande prosjekt med tanke på fornuftig utnytting av arealet og høge kostnadar knytt til rehabilitering av bygget. Det må difor påreknast at mykje av det maritime fagskuletilbodet må bli verande i noverande lokale.

#### **Tilråding**

Fylkesrådmannen tilrår at det vert gjort vurderingar av alternativ lokalisering for ein samla fagskule.

### **Region Sør**

#### Fana gymnas

Den uvisse framtida for skulen er krevjande på fleire måtar. Tilbodet ved Fana gymnas har innverknad på skulane i bydelen og nærliggjande bydelar. Med tanke på overkapasiteten på ST i Bergen er framtidig dimensjonering av ST-tilbodet i Bergen vanskeleg å gjere i eit heilskaplig perspektiv så lenge lagnaden til skulen er uavklart. Skulebygget er gammalt og har trong for utbetringar med tanke på universell utforming. Denne type utbetringar må naturleg nok vente så lenge framtidig aktivitet er uvis.

#### **Tilråding**

Fylkesrådmannen tilrår at avgjerda om framtida til skulen vert framskunda med eitt år til 2015, slik at strukturelle endringar kan ha verknad frå skuleåret 2016/2017.

#### Langhaugen vgs

Gymnastikksalen ved skulen og den eine dansesalen har stor trong for utbetring. Vidare utbygging av skulen må vurderast i samband med strukturen på ST og Studieførebuande program i Stor-Bergen.

#### Nordahl Grieg vgs

Flytting av Service og samferdsel (SS) til Stend vgs vil truleg skje i perioden 2017-2025. Elles er det ingen særskilt aktivitet med tanke på gjennomføring av tiltak i Skulebruksplanen i 2014.

#### Sandsli vgs

Skulen har kapasitet til to nye parallellar på ST i noverande lokale. Det er ingen særskilt aktivitet med tanke på gjennomføring av tiltak i Skulebruksplanen i 2014.

#### Slåtthaug vgs

Skulen har utvida sitt tilbod på BA og har i vår fått ny bygghall. I sonderingane som har vore med Bergen kommune, har skulen blitt vurdert som svært interessant for eit 8-13-samarbeid. Dette vil bli følgt opp i det vidare samarbeidet med Bergen kommune.

#### Stend vgs

Vedteken auke på TO-tilbodet er gjennomført inneverande skuleår, men elles ingen særskilt aktivitet med tanke på gjennomføring av tiltak i Skulebruksplanen i 2014.

#### Os gymnas

Det er for tida ingen særskilt aktivitet med tanke på gjennomføring av tiltak i Skulebruksplanen.

#### Os vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

Fusa vgs

Helsefagskuletilbudet vert oppretthalde.

Det er for tida ingen særskilt aktivitet med tanke på gjennomføring av tiltak i Skulebruksplanen.

**Region Vest**Generelt om ST-problematikken og Fyllingsdalen, Laksevåg og Olsvikåsen

Hovudproblemstillinga i Region Vest er at for mange skular tilbyr ST, slik at kvar av skulane har problem med å få nok parallellar i høve til ønskt skulestorleik. Det har vore gjennomført ein prosess denne våren i høve til tilbudsstrukturen i Bergen Vest, særleg i høve til tilbodet på ST på Fyllingsdalen vgs, Olsvikåsen vgs og Laksevåg vgs, som samla sett har ei innsøking som ikkje er berekraftig. Skulane uttrykkjer tydeleg at det er trong for ei avklaring av situasjonen.

Konklusjonen er at fylkesrådmannen ønskjer eit betre bilete av totalsituasjonen i Stor-Bergen før han kan tilrå strukturelle endringar. Dette inneber bl.a. ein trong for å avklare situasjonen rundt Fana gymnas. Det er tenleg både for Fana gymnas og dei andre skulane at denne avgjerda blir framskunda. Vidare må dette vurderast i høve til kapasitetsauke på Bergen Katedralskole, at Amalie Skram vgs kjem i normal drift, planlagd samanslåing Arna vgs og Garnes vgs og ferdigstillinga av dei nye skulane på Voss.

**Tilråding**

Fylkesrådmannen tilrår at ein ventar til våren 2015 med å fatte ei avgjerd om tilbodet i Bergen Vest. Dette vil innebere at eventuelle strukturelle endringar vil bli sett i verk frå skuleåret 2016/2017.

Fyllingsdalen vgs

Skulen slit med elevgrunnlaget særleg på ST. Skulebygget i seg sjølv er godt eigna til eit større tilbod på ST. Det kan vurderast å auke tilbodet for minoritetsspråklege, og ein kan vurdere å byggje opp skulen som ein «kreativ skule» gjennom utdanningsprogrammet Musikk, dans og drama.

Laksevåg vgs

Rehabilitering av gymnasbygget er naudsynt, men dette er sett på vent til det er gjort ei avklaring kring ST-tilbodet i Stor-Bergen.

Olsvikåsen vgs

Skulen sitt tilbod må vurderast saman med ST- tilbodet i Stor-Bergen. Det kan vere aktuelt å omdisponere eit større areal på skulen til TO.

Askøy vgs

Askøy kommune har varsla at dei ønskjer å vurdere flytting av skulen til Kleppestø, der dei no har starta eit reguleringsarbeid for eit sentrumsområde. Med stigande elevgrunnlag er det tenkt ei utviding av dagens skule. I økonomiplanen er det avsett midlar til planlegging frå 2017. Formannskapet i Askøy kommune har i møte 03.06.2014 gjort følgjande vedtak: «Formannskapet som styringsgruppe er positiv til at Askøy vidaregåande skole kan lokaliseres i Kleppestø sentrum, og ber Rådmannen gå i dialog med Hordaland fylkeskommune.»

Askøy kommune har i møte med HFK gjort greie for planane om plassering av ny vidaregåande skule i Kleppestø sentrum og skissert eit vidare løp der kommunen vurderer å overta dagens vidaregåande skule som ein lekk i planane for å kunne realisere nytt skulebygg i Kleppestø sentrum. Den aktuelle skuletomta ligg tett på kollektivterminal for buss og båt. Fylkesrådmannen vil starte drøftingar med Askøy kommune for å avklare kostnader og framdrift knytt til eit nybygg. Ein må også kome attende til om den nye plasseringa vil ha innverknad på tilbodet ved den nye skulen.

Sotra vgs

Det er for tida ingen særskilt aktivitet med tanke på gjennomføring av tiltak i Skulebruksplanen.



## Region Sunnhordland

### Austevoll vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

### Bømlo vgs og Rubbestadneset vgs

Det har vore arbeid vidare med Bømlo kommune sitt initiativ til å kjøpe Bømlo vgs. Saka om kjøp av skulen vert fremja for politisk handsaming i Bømlo kommune i september. Rådmannen i Bømlo konkluderer i si innstilling med at kjøp av Bømlo vgs ikkje lenger er aktuelt då kommunen ønskjer å bygge heilt ny skule.

### Fitjar vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

### Stord vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

### Etne vgs

Når det gjeld Etne vgs er det i gong eit felles prosjekt mellom Hordaland fylkeskommune og Rogaland fylkeskommune, der ein har sett på ulike modellar for samarbeid om vidaregåande opplæring på tvers av fylkesgrensa. Rapporten frå dette arbeidet vart lagt fram for Fylkesutvalet 20. mai i år.

### Kvinnherad vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

## Region Voss/Hardanger

### Kvam – Øystese gymnas / Norheimsund vgs

Ny skule skal i framtida liggje i Norheimsund. Fylkeskommunen er i dialog med Kvam herad for å drøfte lokalisering av tomt til ein ny vidaregåande skule. På grunn av avstanden mellom einingane må oppstart av arbeidet med ei administrativ samanslåing av dei to skulane sjåast i samanheng med planlegginga av nytt skulebygg.

### Odda vgs

Det er for tida ingen særskilt aktivitet med tanke på gjennomføring av tiltak i Skulebruksplanen.

### Ny skular på Voss

For begge skulane er programmeringsarbeidet avslutta, og grunnlaget for start av byggearbeidet er lagt. Rektorane for dei to nye skulane er tilsette. Dei nyttilsette rektorane vil i perioden fram til skulane står ferdige vere sentrale i samanslåinga av dei 5 eksisterande skulane på Voss.

For Nye Voss vgs startar byggearbeidet opp i august 2014 med planlagt overlevering hausten 2016.

For Nye Voss Gymnas er konkurransegrunnlaget for pris- og designkonkurransen sendt ut, og 6 totalentreprenørar skal komme med forslag og pris i slutten av september 2014. Planen er å ha politisk handsaming i juni 2015 med byggestart i august 2015 og at arbeida er ferdige til hausten 2017.

### Hjeltnes vgs

I samsvar med vedtak i Fylkestinget 12.03.2013 er det sett i gong ein mogleighetsstudie med føremål å etablere nye utdanningsprogram og anna berekraftig utvikling ved Hjeltnes vgs. Arbeidet med studien er organisert som eit prosjekt med ei prosjektgruppe, ei styringsgruppe og ei referansegruppe. Styringsgruppa er oppnemnt av fylkesrådmannen. Dei faste representantane i prosjektgruppa er oppnemnt av styringsgruppa.

Prosjektgruppa er samansett slik:

- Prosjektleder frå næringsseksjonen i Hordaland fylkeskommune, Heidi Bjønnes Larsen

- Representant frå Ulvik herad, ordførar Hans Petter Thorbjørnsen
- Representant frå Hardangerrådet, Leiv Vambheim
- Representant frå Opplæringsavdelinga i Hordaland fylkeskommune, regionleiar Annbjørg Laupsa
- Representant frå Hjeltnes vidaregåande skule, rektor Gunnbjørg Øyre
- Lokal tillitsvald frå Hjeltnes vidaregåande skule, Kåre Olai Solheim frå Delta.

Sidan oppstart i november 2013 har det vore fem møte i prosjektgruppa, styringsgruppa har hatt to møte og referansegruppa har vore samla ein gong. Arbeidet til no har i hovudsak bestått i å identifisere dei områda ein vurderer som mest tenleg å greie ut nærare.

**Tabellen syner område det vert arbeidd vidare med**

**Tema**

**Agrogastronomistudiet fagskule**

**Psykisk helse**

**Reisemål Hjeltnes**

**Frukt og bær på Hjeltnes**

**Hagedesign fagskule**

**Skogbrukutdanning**

**Transportløysingar**

**Vaksenopplæring på Hjeltnes**

**Vidaregåande skule**

Prosjektgruppa er beden om å gje ei tilråding om konkret berekraftig aktivitet innanfor både opplæring og næring innan 10. mars 2015. Rapporten frå prosjektgruppa vil vere fylkesrådmannen sitt grunnlag for saksframlegg til fylkestinget våren 2015.